

Events ... (Conferences, Meetings, Trainings & Workshops)

Banjir di Baling: Pasukan Sukarelawan UiTM CPP Menyertai Misi Bantuan Pasca Banjir di Kupang

oleh Noor Azli Affendy Lee

Susulan kejadian banjir kilat yang berlaku di Baling, Kedah pada 4 Julai 2022, UiTM Cawangan Kedah telah menggerakkan satu misi bantuan pasca banjir yang juga disertai oleh warga UiTM Cawangan Pulau Pinang (UiTM CPP) dalam kalangan staf dan pelajar. UiTM CPP, dengan inisiatif Jawatankuasa Operasi Bencana Negeri (JOBN) UiTM CPP, telah disertai lebih kurang 70 orang staf (2 buah bas UiTM CPP) yang terdiri daripada staf pentadbiran dan akademik pada 6 Julai 2022 (Rabu) ke Sekolah Kebangsaan Kupang, Baling, Kedah untuk membantu dalam kerja-kerja pembersihan kawasan sekitar sekolah dan bilik-bilik kelas yang terjejas akibat banjir lumpur. Terdapat banyak organisasi lain yang memberi bantuan pada hari tersebut termasuk daripada UiTM Cawangan Kedah dan Perlis.

Tugasan yang paling mencabar untuk dijalankan adalah mengaut lumpur tebal yang berada di kawasan taman rumput sekolah. Para sukarelawan perlu menggunakan alat mencangkul dan kereta sorong yang banyak untuk mengaut lumpur. Selain itu, jentera dari pihak luar juga membantu dalam pengumpulan lumpur dan sisa-sisa buangan lain. Menurut pengetua sekolah tersebut, bencana banjir lumpur pada tahun ini adalah kali pertama dihadapi oleh para penduduk di sekitar kawasan itu walaupun sering terjadi banjir pada tahun-tahun sebelum ini. Salah seorang guru sekolah menyatakan bahawa para staf sekolah tidak tahu bagaimana untuk mula membersihkan sekolah pada pagi hari kejadian apabila tiba di sekolah dengan keadaan lumpur yang banyak. Tambahan pula, kawasan sekolah itu berada di kawasan paling rendah, maka kebanyakan sisa banjir terkumpul di situ.

Pada 7 Julai 2022 (Khamis), UiTM CPP sekali lagi menghantar pasukan sukarelawan yang terdiri daripada 61 orang pelajar dan 15 orang staf termasuk pemandu (3 buah bas dan 1 van UiTM CPP) ke sekolah yang sama. Pada hari itu, UiTM CPP juga dibantu oleh pasukan sukarelawan daripada UiTM Shah Alam. Disebabkan kawasan sekolah yang besar, para sukarelawan UiTM CPP meneruskan aktiviti pembersihan di kawasan taman sekolah yang berlumpur. Selain itu, para sukarelawan pelajar juga membantu mengasingkan perabot-perabot serta membuang peralatan pembelajaran yang telah rosak ditempat sampah, dan membersihkan perabot yang boleh lagi digunakan. Semoga usaha murni pihak UiTM CPP ini dapat membantu pihak sekolah serba sedikit agar dapat bangkit semula dari bencana banjir tersebut.



Gambar-gambar sepanjang misi bantuan pasca banjir.